

Naskah Magek Manandin

Contributed by Musro Dahrizal
Friday, 03 September 2004
Last Updated Friday, 03 September 2004

Naskah Magek Manandin adalah naskah yang digunakan untuk Randai, seperti yang di ketahui Randai adalah Seni Tradisionail Minang.

Berkat jasa dari dunsanak kito Eva Nukman, maka naskah ini dapat di muat di cimbuak.

Gurindam 1

1. Tanang panonton bakuliliang
2. Kami ka mulai bacurito
3. Nan ka diri Magek Manandin

4. Magek Manandin dicuraikan
5. Jo diri Subang Bagelang
6. Dalam nagari Sandiang Baka

7. Magek urang koto di ateh
8. Lawan jo rajo buruak paham
9. Di Singkarak namo nagari

10. Maso hiduik Rajo Duo Baleh
11. Nagari inyo nan mangganggam
12. Nyo sangko hiduik tak kamati

13. Dek diri Rajo Duo Baleh
14. Tumbuhan pikiran sakutiko
15. Sadang barundiang inyo kini

16. Ap?. Tah?. Tih?.

Scene 1

Rajo Duo Baleh 1-1

17. Salamaek nan haluih budi
18. Nan bijak bakato kato
19. Bujang mandakek lah kamari
20. Dek denai ado nan taraso

Bujang Salamaek 2-1

21. Ampun baribu kali ampun
22. Ampuni badan diri ambo
23. Sapuluah jari ambo susun
24. Kato bana ambo sabuik juo

25. Hukum buang ambo ka jauah
26. Digantuang ambo ka tinggi

- 27. Bari dek angku kato sungguah
- 28. Nak tantu ambo manuruti

- 29. Apokoh sabab karanonyo
- 30. Mangko ambo di imbau bana
- 31. Adokoh dubalang rabuik rampeh
- 32. Dimano pangulu salah hukum
- 33. Adokoh rando dapek malu
- 34. Walau pun parik nan tarampa

- 35. Kato dek angku sungguah sungguah
- 36. Nak sanang darah didado
- 37. Asah tuanku nan manyuruah
- 38. Baban Salamaek pikua juo
- 39. Alah ka sanang hati angku

Rajo Duo Baleh 3-1

- 40. Manolah Bujang Salamaek
- 41. Nan capek kaki ringan tangan
- 42. Nak lakeh sampai nan di niaeck
- 43. Salamaek cubo simak an

- 44. Mangkonyo buyuang denai imbau
- 45. Pado kutiko iko kini
- 46. Tak ado dubalang rabuik rampeh
- 47. Indak pangulu salah hukum
- 48. Baiak pun parik nan tarampa
- 49. Indak doh rando dapek malu

- 50. Nan takana di badan denai
- 51. Tapikia dalam kiro kiro
- 52. Pikiran baiak nan lah tumbuhan
- 53. Mupahum kokoh nan lah timbuan
- 54. Tantangan diri adiak denai
- 55. Iyolah Puti Nilam Cayo

- 56. Si Nilam lah gadih gadang
- 57. Inyo nan balun bajunjuangan
- 58. Kito pancang malah galanggang
- 59. Kito baralek anam bulan

- 60. Di bantai kabau ampek limo
- 61. Sabuang jo rambuang di adoan
- 62. Siang malam kito bajago
- 63. Panggia nan sisiak palapahan
- 64. Di jamu isi nagari ko
- 65. Di panggia anak sutan sutan

- 66. Itu nan kilanan hati
- 67. Pikiran indak bacabang
- 68. Bujang batenggang lah sakali
- 69. Hari nan elok jan tabuang
- 70. Alah kajaleh dek Salamaek

Bujang Salamaek 4-1

71. Kalau baitu kato angku
72. Hati didalam nan lah sanang
73. Sagalo parentah dari angku
74. Sabuah indak ambo tupang

75. Kini baitu hanyo lai
76. Di himpun Manti jo Dubalang
77. Jan siang ba habih hari
78. To kakok karajo surang surang
79. Ambo batenggang hanyo lai

80. Ap?. Tah?. Tih?.

Gurindam 2

1. Rundiang putuih kato saukua
2. Salamaek bajalan nyo sakali
3. Mancari Manti jo Dubalang

4. Di lapeh siriah bakapua
5. Pamanggja urang di nagari
6. Nan jauah surek malayang

7. Mano panonton nan budiman
8. Kami aliah ujuang curito
9. Magek Manandin kito japuik

10. Sadang tamanuang duduak surang
11. Tanyo lah tibo dek ayah nyo
12. Panonton mari to dangakan

13. Ap?. Tah?. Tih?.

Scene 2

Datuak Bandaro 5-2

14. Nak kanduang Magek Manandin
15. Sibirang tulang nan salapan
16. Bacakak ko garan lahia batin
17. Mangko bamanuang balabiahan

18. Raso dihati indak nyaman
19. Pikiran indak dikarajo
20. Alamaek uleh kamangasan
21. Ragi disiko binasonyo

22. Kok nyampang bintiak batuka
23. Tantu ka salah ragi kain
24. Turak lah latiah pulang baliak
25. Banang tarantang tak paguno
26. Jariah lai badaso indak
27. Arang habih basi binaso

28. Sabab kan ba a dek baitu
29. Kamuko nampak mambayang
30. Agak jo agiah nak batamu
31. Elok lah buyuang bari tarang

32. Kato di anak jaleh jaleh
33. Usahlah hati di pacewang
34. Adaek dunia nyato babaleh
35. Usah buyuang manaruah gamang
36. Nak oi sugiro lah katokan

Magek Manandin 6-2

37. Manolah mandeh kanduang diri
38. Sarato ayah kanduang ambo
39. Mangko tamanuang ambo tadi
40. Lai basabab bakarano

41. Ambo nan sadang duduak duduak
42. Dibawah kamuniang jantan
43. Lah datang surek sapucuak
44. Bujang Salamaek ma anta an

45. Surek panggilan ka galanggang
46. Galanggang Puti Nilam Cayo
47. Nan sadang mancari judu
48. Adiak dek Rajo Duo Baleh

49. Diranah kampuang Singkarak
50. Lah limo bulan galanggang rami
51. Alek nyo rami siang malam
52. Lah banyak rajo nan datang
53. Cukuik jo anak sutan sutan
54. Balun basuo nan Sasuai
55. Ka judu Puti Nilam cayo
56. Sabuang nan rami tiok hari
57. Darah ayam bak dibandakan
58. Patah taji bak di sukati
59. Siriah manjadi sarok balai
60. Pinang manjadi dama tondeh
61. Gambia manjadi tanah liyek

62. Itu lah sabab karano nyo
63. Mangko tamanuang ambo tadi
64. Niaeck dihati alah lamo
65. Nak mancaliak galanggang rami

66. Kini baitu lah dek ayah
67. Duo jo mandeh kanduang diri

68. Ambo mintak kato sapatah
69. Lapeh lah badan ambo pai

70. Indak pai raso tak mungkin
71. Antah urang mancubo kito
72. Bari lah ba a ambo izin
73. Nak sanang darah di dado
74. Ba apo pikiran ayah

Linduang Bulan 7-2

75. Nak kanduang balahan badan
76. Kalau lah itu kandak hati
77. Kami lah suko malapeh an
78. Asah lai luruih pulang pai

79. Kok sampai anak ka balai
80. Usah lamo bajalan jalan
81. Jikok taragak nak bajudi
82. Atau manyabuang jo ba dadu
83. Hati usah di paturik an
84. Habih pitih main baranti

85. Jan sampai mambukak baju
86. Maluluih kain di badan
87. Randah banso sabab dek itu
88. Hilang rono takucak roman

89. Rusuah kan budi ka tagadai
90. Jan sampai paham tajua
91. Sampai ka cucu piyuik kito
92. Manjadi cacek tu nak kanduang
93. Usah manyasa kamudian

94. Itu nyo pasan dari mandeh
95. Di ayah kok lai katambah nyo
96. Kok nyampang singkek tak tauleh
97. Sasa kudian tak paguno
98. Paham kan bana tu dek buyuang

Datuak Bandaro 8-2

99. Nak kanduang Magek Manandin
100. Rundiangan mandeh iyo pulo
101. Nak sunyi lahia jo batin
102. Melah bajalan jo kutiko

103. Melah kutiko iko kini
104. Kutiko bungo sadang kambang
105. Ajuang balahia di musimnyo
106. Danga lah pasan dari ayah

107. Kok hanyo sipek mudo matah
108. Buruak jo baiak kapadoman

109. Larang pantangan adaek minang
110. Sipaek nan tigo kok dikaji
111. Jadi pituah dek nan tuo
112. Simak dek buyuang ayah bincang

113. Partamo Bujang Parisau
114. Kaduo Bujang Pangusau
115. Katigo Bujang Pusako

116. Kok hanyo Bujang Parisau
117. Tagak katangah nyo bamegu
118. Tagak katapi nyo managun
119. Siang malam bahati gamang
120. Patang pagi bahati ragu
121. Malam di gilo angan angan
122. Siang di bimbang agak agak
123. Cadiak malam nan binguang siang
124. Paham sarupo gatah caia
125. Iko elok itu katuju
126. Sarupo pimpiang di lereang
127. Bak aia di sandiang pulau
128. Tunggang kian dareh kamari

129. Kok hanyo Bujang Pangusau
130. Suok kida mamacah parang
131. Mangusuik alam nan salasai
132. Mangaruah aia nan janiah
133. Asuang siantek balabiah
134. Jungkek jo patiang di hati nyo
135. Sayang di urang ka bacarai
136. Banci di urang nan ka elok
137. Kecek gadang timbangan kurang
138. Tinggi ruok dari boto
139. Nan dek urang sagalo bukan
140. Nan dek inyo sagalo iyo
141. Lonjak bak labu di banam
142. Sarupo kambiang dek ulek

143. Kok hanyo Bujang Bapusako
144. Tau di rantiang ka manyangkuik
145. Tau di duri ka mancucuak
146. Tau di tinggi ka ma impok
147. Tau di gadang ka malendo
148. Tau di bayang kato sampai
149. Nan tau jo koroang kampuang
150. Nan tau jo ipa bisa
151. Pandai mangaji baso basi
152. Pandai manggantang aia lauik
153. Pandai manyalam dalam bumi
154. Pandai ma uleh rumin putuih
155. Paga adaek benteang pusako

156. Itulah sipaek ka dipakai
157. Banamo mudo bapusako
158. Bogo tatungkuik tagulampai
159. Bapantang rusak rumah tanggo

160. Paham kan bana elok elok
161. Padoman pagi jo patang

- 162. Asah nan baiak kito kakok
- 163. Tuhan manoloang di balakang
- 164. Alah ka jaleh tu dek buyuang

Magek Manandin 9-2

- 165. Pasan pitaruah dari mandeh
- 166. Pituah dari ayah tadi
- 167. Bak dawaek lakek ka karateh
- 168. Indak kamungkin lupo lai

- 169. Kok lupo antaro lalok
- 170. Lalok di ambiak karasian
- 171. Tasintak takana pulo
- 172. Alah kasanang hati ayah

Linduang Bulan 10-2

- 173. Nak kanduang sibiran tulang
- 174. Sidingin tampa dikapalo
- 175. Sanang hati bukan kapalang
- 176. Nasehaek kami batarimo

- 177. Kini baitu hanyo lai
- 178. Iko lah ameh limo kaco
- 179. Baolah ayam biriang balang
- 180. Ambiak lah taji sacukuiknyo
- 181. Elok kini buyuang bajalan

- 182. Sabuah lai anak kanduang
- 183. Anak kan alah tau juo
- 184. Buyuang kan alah batunangan
- 185. Jo diri Puti Galang Banyak
- 186. Batunangan kain pandukuang

- 187. Mintak lah izin ka bajalan
- 188. Baitu juo nan biaso
- 189. Buruak jo baiak tak bacarai
- 190. Garak alah si apo tau
- 191. Salah kito manuruik adaek
- 192. Sungguah pun awak samo awak
- 193. Adaek nan usah ditinggakan

- 194. Nak salamaek langkah bajalan
- 195. Turuik lah Subang Bagelang
- 196. Jo do?a kami ma iriangkan
- 197. Untuang capek babaliak pulang
- 198. Kito bacarai hanyo lai

Magek Manandin 11-2

- 199. Kalau baitu ka baiak nyo
- 200. Jan rusak enggeran budi
- 201. Kito bacarai samantaro

202. Ambo bajalan hanyo lai

203. Ap?. Tah?. Tih?.

Gurindam 3

1. Kato putuih Magek bajalan

2. Mandeh malapeh inggo janjang

3. Tingga lah ayah tangah rumah

4. Takana Magek jo tunangan

5. Rang gadih Subang Bagelang

6. Dek lah suruahan dari ayah

7. Takana di anak mamak

8. Raso bakucak sandi iman

9. Maranyai paluah didado

10. Raso tadanga rang manyorak

11. Magek ma himbau di halaman

12. Mari to danga baritonyo

13. Ap?.Tah?.Tih?..

Scene 3

Ket: Magek Manandin berada diluar legaran. Dia berbicara dan dijawab oleh Subang Bagelang dari dalam lingkaran.

Magek Manandin 12-3

14. Diak kanduang Subang Bagelang

15. Sibiran tulang nan salapan

16. Jaweklah salam joloang datang

17. Ambo maimbau dihalaman

Subang Bagelang 13-3

18. Tuan kanduang Magek Manandin

19. Tunangan dibadan diri

20. Nan dicinto pagi jo patang

21. Ba a bak cando urang lain

22. Itu cibuak basuah lah kaki

23. Tingkek dek tuan anak janjang

Magek Manandin 14-3

24. Subang Bagelang nan budiman

25. Parintang mandeh jo ayah

26. Dek tagak ambo dihalaman
27. Disangko adiak tak dirumah

28. Gadang lah niaeck nan takana
29. Lah tigo hari jo iko
30. Walau indak disuruh bana
31. Namun ambo ka naiak juo

Subang Bagelang 15-3

32. Putiah kapeh nak samo nyato
33. Putiah hati ba ka a da an
34. Dirumah kito bacarito
35. Lapiak nan alah dibantangan
36. Tuan oi naiak lah sakali

37. Ap?. Tah?. Tih?

Ket: Magek Manandin masuk kedalam lingkaran diantar dengan galombang.

Magek Manandin 16-3

38. Diak kanduang pamenan mato
39. Lah habih siriah sakapua
40. Dek ambo joloang kamari
41. Pado bahabih hari juo
42. Lah patuik mambukak tutua
43. Ambo sabuik kilau dihati

44. Nan taraso raso di lidah
45. Takana dalam kiro kiro
46. Pikiran bulek tak bacabang
47. Mupahum kokoh nan tak sumbiang
48. Niaeck mungkasuik dalam hati
49. Nak pai bajalan jalan

50. Karanah kampuang Singkarak
51. Badan tacinto kagalanggang
52. Kagalanggang Puti Nilam Cayo
53. Adiak dek Rajo Duo baleh

54. Itu di denai nan takana
55. Sambia mancaliak kampuang urang
56. Lapeh denai jo saba rela
57. Untuang capek babaliak pulang
58. Apo pikiran adiak kanduang

Subang Bagelang 17-3

59. Tuan kanduang Magek Manandin
60. Tunangan dibadan ambo
61. Mandanga tuan mintak izin

62. Caia anggota katujuahnyo

63. Sabab kan ba a dek baitu

64. Kasiah nan baru kito mulai

65. Sayang nan baru kito pupuak

66. Tuan bao bajalan jauah

67. Indak koh hibo diri tuan

68. Maningga kan badan diri ambo

69. Katingga jo hati rusuah

70. Bangkalai sadang tagamba

71. Jo tuan mangko nyo sudah

72. Kok tuan nak pai juo

73. Nak samo sanang dalam hati

74. Bao lah badan diri ambo

75. Elok lah kito samo pai

76. Itu di ambo nan taraso

77. Ba a pikiran hati tuan

78. Kok buliah pai baduo

79. Bara kasanang paratian

80. Tuan ma alum tantang itu

Magek Manandin 18-3

81. Adiak kanduang pamenan mato

82. Kalau itu adiak kato kan

83. Nak pai kito baduo

84. Sulik di ambo ma iyo kan

85. Indak baniaek nak malarang

86. Bukan sangajo maninggakan

87. Nan jadi adaek digalanggang

88. Indak bacampua parampuan

89. Lapeh lah ambo pai surang

90. Pasanang sajo dalam hati

91. Kok lai hayat samo panjang

92. Kudian kito samo pai

Subang Bagelang 19-3

93. Oh tuan yang baiak baso

94. Kalau baitu kato tuan

95. Ambo manuruik tak dibao

96. Indak koh ibo maninggakan

97. Oh tuan nan manih muluik

98. Sayang tak dapek dipaduo

99. Namuah bana ambo manuruik

100. Tuan tak namuah ka mambao

101. Rusuah hati rusak pikiran
102. Mandanga tuan ka pai
103. Bakucak iman dalam batin
104. Jikok jauah tuan bajalan
105. Sabalun tadanga mati
106. Indak diganti jo nan lain

107. Kok lamo tuan bajalan
108. Mambuek hati wak ragu
109. Antah pabilo kapulangnyo
110. Tadoroang kasiah bakeh tuan
111. Bak anak arek manyusu
112. Dicarai apo kagunonyo

113. Kok lamo bahati ibo
114. Hanyo manyarah padu Allah
115. Kasiah surang ambo kironyo
116. Bak pisau tajam sabalah

Magek Manandin 20-3

117. Usah adiak barusuh juo
118. Adiak kanduang Subang Bagelang
119. Kok pai bana badan ambo
120. Niaek mancaliak dunia urang

121. Kasiah sajak dirahim ibu
122. Adiak tingga malah dirumah
123. Haram balain dihati ko
124. Namuah basumpah kalamullah

125. Jo kok nyo kasiah nan diganggam
126. Dek nan banyak indak ambo ragu
127. Urang lain dipandang haram
128. Adiak surang sunaek paralu

129. Indak elok adiak manangih
130. Maaf kan kato nan talangga
131. Adiak nan layuak gunuang mipih
132. Salamaek sajo malah tingga
133. Denai bajalan hanyo lai

134. Ap?.Tah?.Tih?.

Gurindam Legaran 4

1. Rundiang putuih kato batimbang
2. Subang Bagelang nyo nak pai
3. Magek tak namuah nyo mambao

4. Tatagun gadih ateh janjang

5. Dek kasiah baru bamulai
6. Dilapeh jo hati hibo

7. Si Magek bajalan panjang
8. Manuju koto rang Singkarak
9. Ka kampuang Puti Nilam Cayo

10. Baru tibo ditapi galanggang
11. Janang batanyo lapeh harak
12. Mari to danga barito nyo

13. Ap?.Tah?.Tih?.

Scene 4

Janang 21-4

14. O Sutan nan baru tibo
15. Disabuik gala balun jaleh
16. Kito batamu sakali ko
17. Balun basudi basiasek

18. Sabuik lah kato jo nagari
19. Namo siapo rang imbau an
20. Nan niaeck sutan kamari
21. Lai kok babuah tangan

22. Itunyo tanyo nan mandatang
23. Malabiah kok sio sio
24. Adaek basuo di galanggang
25. Tanyo batanyo lah biaso
26. Ba apo pikiran sutan

Magek Manandin 22-4

27. Manolah Janang di galanggang
28. Tonggak galanggang nan ampek
29. Adaeknyo masuak kato urang
30. Tantu basudi basi asek

31. Kurang pareso sio sio
32. Kurang ilimu suluah padam
33. Adaek janang itu biaso
34. Lah jaleh buek nan ba ganggam

35. Gala ayah Datuak Bandaro
36. Mandeh banamo Linduang Bulan
37. Di Sandiang ambo gadang
38. Magek Manandin namo ambo
39. Gala nan balun baimbauan
40. Dek alun karumah urang

41. Limbak nan dari pada itu
42. Walau kok indak mamak tanyo
43. Lah tabayang bak kilik camin
44. Lah nyato ayam ambo bao
45. Tantu sangajo nak bamain

46. Tigo tanyo limo pambari
47. Tak ado kurang agak ciek
48. Jan siang bahabih hari
49. To cubo main baketek ketek
50. Ba apo pikiran Janang

Janang 23-4

51. Kalau baitu buni kato
52. Jan kito balalai lalai
53. Tanang lah Magek sakutiko
54. Nak ambo tanyo urang balai

Ket: Janang menanyakan pada orang di Gelanggang tentang apa permainan yang akan dibuat. Sementara itu, Magek bermain dahulu dengan yang lain. Dalam permainan itu Magek menang. Kemudian, Rajo Duo Baleh masuk.

Rajo Duo Baleh 24-4

55. Siapo urang baru ko jang?

Janang 25-4

56. Disusun jari nan sapuluah
57. Maaf ka angku dipuhunkan
58. Ampuni badan diri ambo
59. Hukum buang ambo ka jauah
60. Tuanku juo kahilangan
61. Kato bana disabuik juo

62. Inyo rang ranah Sandiang Baka
63. Banamo Magek Manandin
64. Nan niaeck hati inyo bana
65. Taragak jo angku nak bamain

66. Lah kami cubo malawan
67. Baketek ketek caro kampuang
68. Pitih kami bakisa tangan
69. Kini niaeck nyo nak manyabuang

70. Ayam kuriak bataji gadang
71. Lawan jo Biriang Sanggonani
72. Sabuang salapeh hari patang
73. Kalah manang pambali sugi
74. Ba apo pikiran angku

Rajo Duo Baleh 26-4

75. Kalau baitu kato Janang
76. Sanang rasonyo dalam hati
77. Lambek tibo ka kito jalang
78. Kini lah datang nyo kamari

79. Datang inyo lai dipanggia
80. Surek Salameak ma antakan
81. Lah bak biduak dikayuah ilia
82. Lah main juo nan den angan

83. Kini baitu hanyo lai
84. Nak sanang hati didalam
85. Jan siang bahabih hari
86. Mintak lah tampil taruah ayam
87. Janang sugiro tantang itu

Janang 27-4

88. Kalau baitu kato angku
89. Jan siang bahabih hari
90. Tingga tanang angku da ulu
91. Ambo batenggang hanyo lai
92. Saba tuanku sakutiko

Ket: Spontan. Janang meminta taruhan untuk ayam kepada Magek. Magek memberi taruhan besar. Dia bahkan akan membuka pakaianya jika tidak punya cukup uang untuk menambah taruhan. Namun, Magek kalah. Pakaianya dibuka secara paksa oleh dubalang Rajo Duo Baleh.

93. Ap?.Tah?.Tih?.

Gurindam 5

1. Ayam kalah main salasai
2. Magek bajalan hanyo lai
3. Jalan manyese nyese kampuang

4. Kain jo baju lah tagadai
5. Dek ulah bamain judi
6. Dingin nan indak ka tatangguang

7. Dek latiah litak lah tibo
8. Nyo cari kandang tak baunyi
9. Di sinan badan bakalaian

10. Dek sansaro timpo batimpo
11. Tacemo mamaliang jawi
12. Panonton mari to dangakan

13. Ap?.Tah?.Tih?.

Scene 5

Ket: Dialog spontan. Orang kampung menuduh Magek mencuri sapi. Dia disiksa dengan berbagai pukulan. Tidak lama kemudian tiba lah Rajo Duo Baleh menanyakan hal yang terjadi. Kemudian, orang kampung memberi penjelasan

Sutan Paliangan 28-5

14. Ampun baribu kali ampun
15. Ampun sabaleh jo kapalo
16. Sapuluah jari kami susun
17. Kato bana di sabuik juo

18. Kok urang nan kami bao
19. Lawan tuan ku main tadi
20. Nyo mangusuik dikampuang kito
21. Sampai inyo mamaliang jawi

22. Takajuik urang ateh rumah
23. Heboh taranak dalam kandang
24. Ka angku kato tasarah
25. Antah pajako katabuang
26. Rundiang bapulang pada angku

Rajo Duo Baleh 29-5

27. Manolah Manti dalam kampuang
28. Kalau baitu pakabaran
29. Lah asah siang bak hari
30. Lah nyato tarang bak bulan

31. Kami baitu Manti tuo
32. Nak jan ta ulang duo kali
33. Kabek an pajako di pondok rundo
34. Nak tampak dek urang rami

35. Kok utuang lalu rang kampuangnya
36. Tantu ka sampai pasan awak
37. Pasan nan indak baturuti
38. Itu nyo kato dari ambo
39. Jan malam ba habih minyak
40. Manti batenggang lah sakali

Manti 30-5

41. Kalau baitu kato angku
42. Sanang rasonyo paratian
43. Tingga tanang angku da ulu

44. Titah ka kami karajoan
45. Kami sugiro hanyo lai

46. Ap?. Tah?. Tih?.

Gurindam 6

1. Magek lah jatuah duo kali
2. Ibaraek di impik janjang
3. Kini ma unyi pondok rundo

4. Jikok santano kito rasai
5. Tak mungkin kampuang katajalang
6. Mungkin ka larek salamonyo

7. Mano panonton nan budiman
8. Kami aliah tujuan kaba
9. Nan ka diri Rajo Kuaso

10. Nyo turuik anak kanduang badan
11. Jawi pambajak nan takana
12. Mari to danga barito nyo

Scene 6

Rajo Kuaso 31-6

13. Nak kanduang balahan diri
14. Subang Bagelang asa namo
15. Mangko ayah turuik kamari
16. Ado dek ayah nan taraso

17. Nan takana di badan ayah
18. Tapikia dalam kiro-kiro
19. Urang lah ka mulai ka sawah
20. Jawi pambajak alun ado

21. Ayah taniaek nak bajalan
22. Ka ranah kampuang Singkarak
23. Kok uantuang pambari Tuhan
24. Dapeklah jawi ka pambajak

25. Itu di ayah nan takana
26. Sangajo mancari jawi
27. Sabalun hari tinggi bana
28. Lapeh di anak ayah pai

Subang Bagelang 32-6

29. Manolah ayah kanduang ambo
30. Pambimbang pagi jo patang
31. Kalaulah itu ka baiak nyo
32. Tak mungkin ambo ka malarang

33. Ambo lapeh jo suko hati
34. Hari nan baiak jan tabuang
35. Kok lah basuo nan dicari
36. Capek ayah babaliak pulang
37. Apo pikiran hati ayah

Rajo Kuaso 33-6

38. Kalau baitu kato anak
39. Malapeh ayah bajalan
40. Ka tuhan kito mamintak
41. Sasuai sajo palangkahan

42. Nak kanduang Subang Bagelang
43. Sabuah lai nan takana
44. Tapikia di badan ayah
45. Taga dek ayah kabajalan

46. Kok hanyo sipaek rang padusi
47. Nan talukih didalam adae
48. Jadi bincangan dek nan tuo
49. Tabagi tigo anak kanduang

50. Partamo padusi Simarawan
51. Kaduo Rembang Tali Awan
52. Katigo padusi Sabananyo
53. Disabuik padusi bapusako

54. Jikok padusi Simarawan
55. Paham nyo bak gatah caia
56. Bak aia di sandiang pulau
57. Tunggang kian dareh kamari
58. Itu elok iko katuju
59. Kian sayang kamari kasiah
60. Bahati bimbang salalu

61. Jikok nan Rembang Tali Awan
62. Iko padusi tinggi hati
63. Lonjak bak labu di banam
64. Bak kacang di habuih ciek

65. Suko mamuji muji diri
66. Nan di awak sagalo rancak
67. Nan di urang sagalo bukan
68. Diam di rumah nyo pantangan
69. Gilo malala ilia mudiaik
70. Sarupo kambiang dek ulek

71. Larangan adae kok kau tampuan

72. Syarak kok namuah malongkahi
73. Narako juo tantangan nyo
74. Di akiraek antah bak mano

75. Jikok padusi Bapusako
76. Tapakai taratik jo kurenah
77. Tau di ereang nan jo gendeang
78. Tau di sopan nan jo santun

79. Tau di duri ka mancucuak
80. Tau di rantiang ka manyangkuik
81. Nan tau di paruik litak
82. Marasakan hauih jo lapa

83. Kok pai kalua rumah
84. Kok tak bakawan ndak bajalan
85. Bajalan manakua nakua
86. Mangana asa mulo jadi

87. Patuik anak bao bapikia
88. Pakaian padusi bapusako
89. Walau bak mano dayo dunia
90. Bapantang rusak rumah tango

Subang Bagelang 34-6

91. Nan ayah tarangan tadi
92. Itulah kato sabana nyo
93. Di simpan dalam runggo hati
94. Jadi padoman salamo nyo

95. Siang di ambiak kapadoman
96. Malam ka banta kalang hulu
97. Simpai lah kokoh di ganggaman
98. Ma?alum ayah tantang itu

Rajo Kuaso 35-6

99. Nak kanduang sibiran tulang
100. Alah mah taguah iman didado
101. Sanang hati bukan kapalang
102. Nasehaek ayah batarimo

103. Kini baitu lah dek anak
104. Lah sanang hati ayah pai
105. Sabalun hari tinggi bana
106. Ayah bajalan hanyo lai

Gurindam Legaran 7

1. Salasai rundiang maso itu
2. Lah bajalan Rajo Kuaso
3. Manuju kampuang rang Singkarak

4. Indak ado bahati ragu
5. Sudah barundiang jo anak nyo
6. Mancaliak taguah paham anak

7. Dek lamo inyo bajalan
8. Bajalan bagageh gageh
9. Maranyai paluah di dado

10. Alun lai lapeh palak badan
11. Batamu Rajo Duo Baleh
12. Sinan tabukak kato kato

Rajo Duo Baleh 36-7

13. O tuan Rajo Kuaso
14. Nan cadiak nan biyo pari
15. Ado kok niaek jo sangajo
16. Mangko sampai tuan kamari

17. Heran sungguah denai mamandang
18. Tapikia dalam kiro-kiro
19. Elok lah tuan bari tarang
20. Nak sanang darah di dado

Rajo Kuaso 37-7

21. Rajo Duo Baleh nan budiman
22. Nan bijak bakato kato
23. Kalau itu nan batanyoan
24. Danga kan malah baritanyo

25. Mangko sampai denai kamari
26. Ka ranah koto Singkarak
27. Niaek hati mancari jawi
28. Mancari jawi kapambajak

29. Bulan Syawal alah sapangga
30. Ka masuak bulan Zulhijjah
31. Nak niaek hati ambo bana
32. Dibulan haji nak ka sawah

33. Itu nan niaek jo sangajo
34. Dek hari ka musim hujan
35. Jawablah kato dari ambo
36. Nak samo sanang paratian

Rajo Duo Baleh 38-7

37. Kalau baitu niae k hati
38. Lah jaleh tujuan kato
39. Lai basuo nan dicari
40. Ado di ambo kini nangko

41. Badannya indak gapuak amek
42. Di indak taranak rang Singkarak
43. Badan kuruih dagiang saketek
44. Tapi lah elok ka pambajak

45. Kalau di inok dimanuangan
46. Mungkin taranak Sandiang Baka
47. Kok lai katuju tu dek tuan
48. Harago indak maha bana

49. Itu nyo kato dari ambo
50. Alah ka sanang hati tuan
51. Nak tantu baiak buruaknya
52. Melah to caliak ka pautan

Rajo Kuaso 39-7

53. Kalau baitu nan ka baiak
54. Lah samo sanang paratian
55. Nak capek ambo babaliak
56. Elok kini kito bajalan

57. ApÃ¢,-Ã!.TahÃ¢,-Ã!.TihÃ¢,-Ã!.

Randai Cepat

Ket : Sebelum Rajo Duo Baleh dan Rajo Kuaso masuk, Magek dipukuli oleh Dubalang. Magek kemudian terpekkik melihat pamannya dan langsung berbicara dengan harapan akan dibantu oleh pamannya.

Magek Manandin 40-7

58. Oh mamak Rajo Kuaso
59. Bari lah baa ambo aia
60. Indak tatahan lai rasonyo
61. Tulang salapan lah raso caia

Rajo Kuaso 41-7

62. O buyuang Magek Manandin
63. Lai mah tantu di nan lapa
64. Lai mah taraso hauih badan
65. Manga namuah mamaliang jawi
66. Indak ang timbang salah bana
67. Kini badan ang manangguangan

Ket: Rajo Kuaso pun ikut memukul Magek. Setelah lelah baru bicara.

Rajo Kuaso 42-7

68. Mano Dubalang ka ampek nyo
69. Tagak kamari kini kini
70. Ba apo balalai juo
71. Sumbao kolai makan gaji

72. Kabek malah si buyuang ko
73. Arak lah kaliliang kampuang
74. Padeh lado nak nyo raso
75. Paja indak tau di untuang

Linduang Bulan 43-7

76. O tuan Rajo Kuaso
77. Apo bana salah si buyuang
78. Mangko tuan bunuah badannya
79. Bapikia baa tuan kanduang

80. Jikok sabab ameh jo perak
81. Lai banyak ambo manaruah
82. Sipaek Rajo indak marusak
83. Apo lai sampai mambunuah

84. Utang ameh ambo mambaia
85. Hukum buang kami nak jauah
86. Patuik tuan bao bapikia
87. Banyak lai jalan ka ditampuan

88. Kok Rajo bana di nagari
89. Kok sutan bana di kampuang ko
90. Sasek suruik talangkah kumbali
91. Suruiknyo ka bana juo

92. Alun di usua di pareso
93. Asuangan urang ba iyo an
94. Tuan lah jaleh sio sio
95. Sasa kok tumbuah kamudian

Rajo Kuaso 44-7

96. Usah kau banyak carito
97. Usah ma ambek mahalangi
98. Jan kau manciracau juo
99. Aden kan Rajo di nagari

100. Buek di koto nan bajaja
101. Dusun taratak nan ba umpuak
102. Mulo nan dari Sandiang Baka
103. Panyinggahan jo Muaro Pingai
104. Sumanji jo Koto Sani

105. Kok batali buliah den irik
106. Batampuak buliah den jinjiang
107. Buliah den ampiang picak picak
108. Buliah den giliang bulek bulek
109. Buliah den hitam den putiah kan
110. Bulek sagolek kato wak den

111. Dek ulah bamain judi
112. Sampai manjua jo manggadai
113. Habih pitih mamaliang jawi
114. Kini bia lah nak nyo rasai

115. Pantangan niniak sajak dulu
116. Urang pancilok jo pamaliang
117. Dari padu mambuek malu
118. Bia den tungga babeleang

Puti Bungsu 45-7

119. Mano lah mamak kanduang ambo
120. Indak elok talampau dandam
121. Kurang pareso sio sio
122. Kurang ilimu suluah padam

123. Pandang mamak di lahia sajo
124. Nan batin babuang ka balakang
125. Ba alah nasib badan ambo
126. Badan baduo tingga surang

127. Kok iyo bana mamak Rajo
128. Alun jaleh salah lah batimbang
129. Patuik di usua di pareso
130. Jan nan kalamak di mamak surang

131. Sungguah pun salah tuan ambo
132. Mamak ka bana balun tantu
133. Dek pandoroang gadang bahayo nyo
134. Bao bapikia lah da ulu

135. Rusuak jalan lah mamak tampuan
136. Pantang lah jadi pajatian
137. Adaek rusak agamo runtuh
138. Alamaek mamak ka jahanam

139. Alun takajuik lah ma ambua
140. Baru takakok tabae an
141. Sulik manjapuik nan talanjua
142. Sasa kok tumbuah kamudian

Rajo Kuaso 46-7

143. Usah kau manciracau juo
144. Aden pulo nan kau ajari

145. Kandak den Rajo Kuaso
146. Usah ma ambek ma halangi

147. Mano Dubalang nan barampek
148. Basigap kalian kini kini
149. Agak pa arek malah kabek
150. Kito bajalan hanyo lai

Dabalang 47-7

151. Kalau baitu titah angku
152. Kami nan indak ka manumpang
153. Tingga tanang angku da ulu
154. Kabek nan lungga nak di ulang

Ket: Selesai mengikat, Magek bicara.

Magek Manandin 48-7

155. Manolah mandeh kanduang ambo
156. Diak kanduang balahan badan
157. Bari lah maaf nan malangko
158. Rila kan sado nan tamakan

159. Rilakan aia susu mandeh
160. Ambo ko diseso untuang
161. Jaso mandeh alun tabaleh
162. Mungkin ka larek dari kampuang

163. Adiak bunsu tingga lah tingga
164. Jago lah ayah jo bundo
165. Di baliak papan nan sabilah
166. Adiak ka denai kana juo

167. Lapeh lah denai jo hati suci
168. Rilakan sajo nan tamakan
169. Budi ka denai anjuang tinggi
170. Maafkan sagalo kasalahan

Dabalang 49-7

171. Oi Magek dangakan bana
172. Kato nan indak ang pikia kan
173. Rundiang sarupo katiak ula
174. Nan indak ado kasudahan

175. Bantuak sarupo urang elok
176. Pandai bana babaso basi
177. Rancak nan baiak wa ang kakok
178. Dari padu mamaliang jawi

179. Kini baitu hanyo lai

180. Usah ang banyak banyak kecek
181. Dek hari basarang tinggi
182. Elok kini kito barangkek

183. ApÃ¢,-Ã!. TahÃ¢,-Ã!. TihÃ¢,-Ã!.

Gurindam Legaran 8

1. Magek di irik ilia jalan
2. Si bunsu marauang jo mandehnyo
3. Indak tabado hati ibo

4. Mano panonton nan budiman
5. Kami aliah tujuan kato
6. Ka diri si Buruang Nuri

7. Salamo buruang Nuri tabang
8. Tatukiak pandang nan dakek
9. Hati nan indak sanang lai

10. Dalam lurah satungka banang
11. Tampak urang sadang bakabek
12. Andailah jatuah dek si Nuri

Buruang Nuri 50-8

13. Manolah tuan janyo ambo
14. Disabuik gala indak tantu
15. Bari luruih ambo batanyo
16. Dek kito baru batamu

17. Ba a koh asa jo mulonyo
18. Mangko co iko parasaian
19. Curaikan ba a padu ambo
20. Nak samo sanang paratian

Magek Manandin 51-8

21. Kalaualah itu Nuri tanyo
22. Mangko co iko parasaian
23. Dek ulah judi nangko juo
24. Sampai tacemo tangah pakan

25. Tacemo mamaliang jawi
26. Di ranah koto Singkarak
27. Mangko tabuang di nagari
28. Ambo ko dihukum mamak

29. Mamak ambo Rajo Kuaso

30. Titahnyo pantang di tupang
31. Indak nyo usua nyo pareso
32. Hukum jatuah ambo tabuang

33. Salah tak buliah mintak ampun
34. Kok sasek tak buliah suruik
35. Kato mamak malu lah batimbun
36. Bana tak dapek ambo sabuik

37. Kini baitu hanyo lai
38. Dalam batanyo kanai tanyo
39. Toloang katokan asa Nuri
40. Nan punyo siapo pulo

Buruang Nuri 52-8

41. Kalau baitu kato tuan
42. Iyo pulo itu kironyo
43. Asa Nuri nan batanyoan
44. Dari subbarang Aia Gilo

45. Tigo hari lamonyo tabang
46. Mangko sampai ambo ka siko
47. Jikok nan punyo ajuang pelang
48. Banamo Puti Taruih Mato

49. Ibaraek dagang basandaran
50. Inyo nan punyo badan ambo
51. Sakadar panjawek tanyo tuan
52. Alah ka sanang kiro kiro

Magek Manandin 53-8

53. Mandanga kato dari Nuri
54. Lah sanang dalam kiro kiro
55. Kini mamintak ambo ka Nuri
56. Toloang lah bukak kabek nangko

Buruang Nuri 54-8

57. Mandanga kato dari tuan
58. Itulah kato sabananyo
59. Dek ambo indak batangan
60. Tantu balambek bakarajo

61. Nak ambo ansua lah mancotorok
62. Walau sahari duo hari
63. Asah nan baiak kito kakok
64. Untuang tajajak tanah tapi

Gurindam Legaran 9-Minang

1. Dek yakin Nuri Mancotok
2. Tabukak kabek kasadonyo
3. Nuri nyo aliah tampek inggok
4. Jalan kalua dicarinyo
5. Magek mandaki hanyo lai
6. Mandaki jo manau sonsang
7. Taruih bajalan nyo sakali
8. Tibo dijalan tigo simpang
9. Dapeklah kaba maso itu
10. Pasan di bao rang panggaleh
11. Tunangan lah dapek judu
12. Iyo jo Rajo Duo Baleh
13. Dek diri Magek Manandin
14. Taruih ka sumua Subang Bagelang
15. Tibo di sumua balantai camin
16. Maimbau Subang Bagelang
- Subang Bagelang 55-9
17. O tuan nan baru tibo
18. Gala siapo rang imbaio kan
19. Indak tuan batanyo tanyo
20. Sumua lah nyato balarangan
- Magek Manandin 56-9
21. Kalau itu nan Puti bincang
22. Maaf kan ambo tantang itu
23. Ambo kan urang baru datang
24. Dusun nagari indak tantu
25. Ambo di bao untuang buruak
26. Kini tacinto ambo mandi
27. Bak tapuang jatuah ka luluak
28. Indak ka mungkin elok lai
29. Itu sabab sumua ditampuan
30. Ambo lah lamo indak mandi
31. Mamintak ambo sungguah sungguah
32. Usah lah Puti ketek hati
33. Sabuah lai pintak ambo
34. Adiak kanduang Puti nan datang
35. Bari luruih ambo batanyo
36. Kampuang ko dek baru ambo jalang
37. Apo namonyo kampuang nangko
38. Siapo Rajonyo di nagari
39. Dulu ambo mandapek kaba
40. Maso ambo diam di kampuang
41. Nan bagala Rajo Kuaso
42. Ado surang bakamanakan
43. Nan geneang di Sandiang Baka
44. Iyo disabuik urang bana
45. Juaro ditangah balai
46. Banamo Magek Manandin
47. Dulu ambo lai basuo
48. Kiro satahun nan talapeh
49. Itu nyo tanyo dari ambo
50. Guno jan sampai ilang bakeh
- Subang Bagelang 57-9
51. Kalau baitu kato tuan
52. Lah patuik ambo bari tarang
53. Tanyo sarupo ka kiasan
54. Raso manyuruak di nan tarang
55. Kok iyo tuan lai basuo
56. Jo diri Magek Manandin
57. Tuan bao lah pasan ambo
58. Pasan sarato jo pakirim
59. Sabab kan ba a dek baitu

60. Nak ambo kato kan bana
 61. Nan banamo Magek Manandin
 62. Inyo tunangan badan ambo
 63. Batunangan kain pandukuang
 64. Antah lai hiduik inyo kini
 65. Sabab di buang ayah ambo
 66. Dek asuang Rajo Duo Baleh
 67. Nyo cemo mamaliang jawi
 68. Sampai babuang jauah jauah
 69. Kalurah satungka banang
 70. Antah dima lah inyo kini
 71. Mungkin di dalam gaib Allah
 72. Tanyo tuan alah di bari
 73. Ka tuan rundiang tasarah
 Magek Manandin 58-9
 74. Kalau baitu bunyi kato
 75. Nak tabukak sumangek diri
 76. Satali juo tanyo ambo
 77. Jo nan adiak kato kan tadi
 78. Kok lai hiduik inyo kini
 79. Nak ambo sampai an kapadonyo
 80. Ado koh adiak duo hati
 81. Lai kok suko manarimo
 82. Kok pasan nan ambo bao
 83. Salamo inyo tabuang
 84. Banyak cobaan ditangguang nyo
 85. Bansaik balabiah dari urang
 86. Sabab kan ba a dek baitu
 87. Barito sampai ka inyo
 88. Adiak alah mandapek judu
 89. Rajo Duo Baleh nan kodo nyo
 Subang Bagelang 59-9
 90. Kok hiduik Magek Manandin
 91. Bara kasanang paratian
 92. Caliak lahia pandanglah batin
 93. Ambo nan taguah jo janjian
 94. Walau badantuang patuih tungga
 95. Manggaga sampai ka hulu
 96. Kabek di ambo tak ka lungga
 97. Kasiah lah tiok halai bulu
 98. Kok tibo Rajo Duo Baleh
 99. Ulah di paso ayah ambo
 100. Senteang kok indak dapek uleh
 101. Ambo ka larek di kampuang ko
 Magek Manandin 60-9
 102. Lah tampak bayangan batin
 103. Mancaliak kokoh sandi iman
 104. Kok hanyo Magek Manandin
 105. Ma imbau adiak kalampau an
 106. Diak kanduang Subang Bagelang
 107. Patuik disingkok lahia batin
 108. Jawek lah salam rang tabuang
 109. Kan ambo Magek Manandin
 Subang Bagelang 61-9
 110. Ondeh tuan Magek Manandin
 111. Tuan baliku di nan tarang
 112. Sajak tadi ambo lah yakin
 113. Baraso tuan nan lah pulang
 114. Lai mah dunia ka babaleh
 115. Lai mah kasiah ka balawan
 116. Dandam ka Rajo Duo Baleh
 117. Kini lah patuik di balehan
 118. Tuan pai lah ka galangggang
 119. Pai manyabuang sakali ko
 120. Ayam biriang bataji gadang

121. Lawannya Kuriak Gadik Gudinggo
 122. Kok kalah usah di baia
 123. Manang kok indak manarimo
 124. Kok nyato salah dek manusia
 125. Lawan dek tuan jo anggota
 126. Usah dihalang kapalangi
 127. Sari?aeck palu mamalu
 128. Kok iyo anak laki laki
 129. Tuah di siko mangko tantu
- Magek Manandin 62-9
130. Diak kanduang gadih budiman
 131. Subang Bagelang asa namo
 132. Kalau lah itu nan ta angan
 133. Japuik lah ayam kuriak kito
 134. Japuik pakaian sapasalin
 135. Sarato ameh kataruahnyo
 136. Toloang doakan dalam batin
 137. Tajapuik malu sakaliko
- Subang Bagelang 63-9
138. Kalau baitu nan ka baiak
 139. Ambo bajalan lah sakali
 140. Ka pulang tuan kok tabatiak
 141. Rancak disiko lah mananti
 142. Ambo bajalan lah da ulu
 143. Ap?tah?tih??.

Gurindam Legaran 10

1. Bajalan Subang Bagelang
2. Manjapuik ayam jo taruah nyo
3. Darah di dado bak katabang
4. Basuo nan indak disangajo

5. Satibo Subang dirumah
6. Lah dapek sagalo nan paralu
7. Indak taraso badan payah
8. Babaliak ka sumua maso itu

9. Pakaian dapek Magek bakameh
10. Nyo turuik galanggang rami
11. Basuo jo Rajo Duo Baleh
12. Rundiang bamulai nyo sakali

Rajo Duo Baleh 64-10

13. O Sutan nan baru tibo
14. Dek sutan datang talambek
15. Jaweklah salam joloang datang
16. Antah salah pandangan mato
17. Saroman labiah saketek
18. Sarupo bana jo nan hilang

19. Anak dek Datuak Bandaro
20. Banamo Magek Manandin
21. Lah dibuang basamo-samo

22. Ka hiduik raso tak mungkin

23. Usah lah itu dipikia an
24. Urang dibuang dek mamaknyo
25. Dek sutan tibo bak kini
26. Adokoh niaeck jo sangajo

Magek Manandin 65-10

27. Kalau itu angku tanya an
28. Itulah kato sabananyo
29. Malenggang babuah tangan
30. Adaek galanggang alah biaso

31. Sabab baitu kato ambo
32. Ambo bao ayam bataji
33. Tuah lah tampak dirupo nyo
34. Mungkasuik ambo kamari
35. Niaeck manyabuang nan tacinto
36. Dek angku kandak nak babari

37. Itu nyo kato nan talatak
38. Untuang tasarah ka llahi
39. Cubolah timbang jo gamak
40. Lai koh samo dalam hati
41. Pulang ma?alum pada angku

Rajo Duo Baleh 66-10

42. Kalau baitu parundiangan
43. Pucuak dicinto ulam tibo
44. Lai ka buliah nan diangan
45. Nanti dek sutan sakutiko
46. Denai barundiang jo rang balai

Rajo Duo Baleh ka urang balai 67-10

(Spontan tentang menyabung ayam. Ayam Rajo Duo Baleh kalah. Berkelahi spontan. Boleh hadirkan Subang Bagelang bersanding dengan Magek Manandin.)